



卷之十三  
職官志  
秩官傳

ル 5  
3258  
13



門 5  
3258  
卷 13

黃州府志卷之十三

黃州府知府英 啟纂輯

職官志

秩官傳

晉

黃岡縣

戴邈廣陵人永嘉間西陽內史有勁節清操通志

毛寶字碩真滎陽武人咸康四年庾亮鎮武昌表為江夏相

督隨義陽二郡亮謀北伐令與西陽太守樊峻以萬人守邾

城石虎遣其子鑒及其將夔安李亮等率二萬騎來攻援兵

不至城陷寶及峻遂與士眾六千人赴江死參通志

黃州府志 卷之十三 秩官傳

和 年  
十 月 八 日

梁

吉士瞻馮翊蓮勺人天監閒西陽太守在郡清約家無私積通志

隋

王世積闡熙新國人高祖受禪進封宜陽郡公高顯知其才能甚善之授蘄州總管平陳之役以舟師自蘄水趨九江有功進位柱國荊州總管

唐

左震涇縣人肅宗時黃州刺史乾元元年遣中使女巫乘傳分禱天下名山大川黃州有巫盛年美色暴橫尤甚震至驛門破鏑入曳巫至階下斬之悉斃所從少年籍其贓數十萬請

以代貧民租民始歌曰我欲逃鄉里我欲去墳墓左公今既

來誰忍棄之去越歲又歌曰吾鄉有鬼巫惑人人不知天子

正尊信左公能殺之累拜荊州刺史案震斬巫事續甚偉舊志略今參嘉慶通志加

詳

杜牧字牧之樊川人第進士太和閒黃州刺史專任德教剛直有奇節吏民懷之

蘄州

員半千字榮期齊州全節人中宗時宏文館學士有清節武三思用事出為蘄州刺史不專任吏務以文雅化俗禮教大行伊慎字寡悔兗州人通春秋國策天官五行書李希烈反曹王皋拔為大將會賊沂江徇地皋授慎兵與賊戰大破之拔蔡

山遂下蘄州即拜刺史封南充郡王天子在梁州包信轉東南財糧次蘄口賊遣驍將杜少誠以兵萬人遏江道不得西

慎擊斬賊將許少華漕無留滯

唐書本傳

呂元膺字景夫鄆州東平人德宗時蘄州刺史除夕錄囚囚或以父母在歲旦不得省為恨因泣元膺悉脫械縱之而戒期還吏白不可答曰吾以忠信待人人豈我違如期俱至自是羣盜感愧避境去後除鄂岳觀察使

韓思彥字英遠蘄州錄事參軍嘗過汴州有張僧徹者廬墓三年詔表其閭請思彥為墓志餽縑二百不受徹固請之乃受一縑謂家人曰此孝子縑也不可輕用其清介類是

南唐

黃梅縣

陳起蘄州人昇元閒進士令黃梅時妖人諸祐挾左道惑人從者數百起聞籍祐為里長不服且出謾言起捕斬之由是知名拜御史

通志參州志蘄水志

宋

王明字如晦成安人乾德初荆湖轉運使開寶七年將用師南唐以明為黃州刺史帝密授成算明既視事即完葺城壘訓練士卒眾莫解其意俄而王師自荆渚乘戰艦下即以明為池州至岳州江路巡檢戰權都部署所向克捷遂平金陵

孫光憲陵州人太祖時黃州刺史有治聲

通志

王禹偁字元之鉅野人咸平初知黃州聞濮州盜夜入城略知

黃州府志卷之十三  
州監軍因疏江淮諸郡宜並置守捉軍士閱習弓馬葺城壁  
完甲冑爲禦侮之備上嘉納之州境二虎鬪其一死食之殆  
半羣雞夜鳴經月不止冬雷暴作傳疏引洪範陳戒且自劾  
上遣內侍勞問醮禳之日官云守土者當其咎上惜其才命  
徙蘄州未踰月卒

樂史知黃州性簡默能處繁劇在郡獻廣孝傳五十卷總仙記  
一百四十一卷

韓琚仁宗時知黃州弟琦詩曰予兄天聖中向攝齊安守兄才  
無不宜吏治孰可偶公庭常寂然所樂在文酒

馬正卿元豐閒知黃州愛民下士廣學舍禁妖巫人咸感之  
徐大受字君猷神宗時知黃州崇儒重道下士愛民多善政蘇

軾嘗稱之

陳軾元豐閒知黃州時蘇軾謫黃人皆引避懼其累己軾獨願  
交遊期共憂患

趙令戩安定郡王令禎兄建炎初通守鄂州領兵戍武昌賊閻  
瑾掠黃州去戩渡江存撫之黃人乃安李綱言於朝擢知黃  
州奉詔修城六月而畢屢卻劇寇以內艱去詔起復時金人  
犯黃州郡卒浮江告急戩疾趨夜半入城金人力攻城陷欲  
降之大罵不屈敵怒鞭之流血被面罵不絕口而死都監王  
遠判官吳源巡檢劉卓同赴難死之事聞贈戩徽猷閣待制  
諡曰忠愍

孫初字居敬東陽人淳熙閒進士知黃州有善政

何大節字中立嘉定十四年知黃州金人圍黃詔馮榘督兵援之逗遛不進大節召僚佐各予便差使自為去計乃取郡印佩之誓以死守一夕左右告曰城陷矣大節從容出投江死孟珙字寶玉棗陽人知黃州增陴浚隍蒐討軍實邊民來歸日以千數為屋三萬閒居之厚加賑貸又創兩堡分處軍士兵威大振自茲經略荆襄金人憚之

莫濛字子濛歸安人以祖廕累官大理寺正時黃州倅奏親擒盜五十餘人帝命濛窮竟既至咸以寃告濛命去囚桎梏引倅至庭詢竊發之由鬪敵之所遠近時日悉皆抵牾折之語塞濛具正犯數人奏上餘釋之帝諭輔臣曰莫濛非獨曉刑獄可俾理金穀除戶部員外郎後除湖北轉運判官復知鄂

州卒於官

孟震字亨之元豐閒通判黃州有令德時稱其庭為君子庭庭

中有泉蘇軾名曰君子泉

案茅志震字亨之通志作孟震亨誤

任伋字師中眉山人通判黃州寬柔惠愛負氣節與兄孜齊名

當時稱大任小任師中既沒黃人結庵祀之

陳仲微字致廣高安人嘉泰二年進士通判黃州理饟饋以身律下隨事檢攝軍興賴以不乏制置使將上其最辭曰此職分也何最之有

張世傑范陽人理宗時累功至黃州武定諸軍都統制與高達

援鄂州有功從賈似道戰蕪草坪奪還元所俘

通志

米立淮安人從陳奔守黃州元兵至奔降立潰圍出江西制置

使黃萬石署為帳前都統制元兵略江西立迎戰被執不降

行省遣萬石諭之立曰立一小卒何足道但三世食宋祿宋

亡何以生為再三說之不屈遂遇害志通

洪芻字駒父樂平人宣和間為黃州酒正廉潔自持權酷有法

毋制機蜀人分教黃州兼領河東雪堂二書院教人以明體達

用為先學者稱為平山先生

龐籍明道間黃州司理參軍獄無冤滯時夏竦知黃州謂籍有

宰相器後果然

黃岡縣

張激籍貫未詳前志稱其治邑有善政縣志祀名宦

麻城縣

錢治字良範武進人進士景德間舉茂才異等以推官監麻城

茶場遷著作郎終尚書屯田郎長於決獄歷有循聲歐陽修

亟稱之舊志祀名宦

張毅熙寧間知麻城夾道植松萬株蘇軾謫黃作詩詠之入山

祈雨雨降賦詩刻石志通

胡定之熙寧間監酒稅嘗載書萬卷喜借人觀蘇軾謫黃定交

日從軾遊志通

楊揆字純父臨川人進士理宗時麻城尉向士璧守黃州檄入

幕尋以戰功升三官

蘄州

劉沆字衝之永新人天聖間知蘄州州有巨姓尹氏偽券侵田

沈鞠奪之人稱其明

李宥字仲嚴青州人進士仁宗時知蘄州歲凶委棄嬰孩者道相屬宥命吏收取計口給穀俾營婦均養之每旬閱視所活甚眾或殺人以米十石給傭者使就獄曰我重賄吏爾必不死宥得其情論如法

韓世清知蘄州州人請為兵馬鈐轄有賊劉忠入境世清設方略破之

張商英字天覺新津人元符間知蘄州有善政祀名宦

余童徽宗時知蘄州歲饑急賑濟盡括境內人戶第為三等量

口貸之又度五邑地置場均粟立法伺察民以為便通志作余童明

王玠長洲人景定閒為蘄黃鎮撫使司幹辦公事會鎮撫使孔

彥舟謀叛玠開陳百端不聽大罵曰逆賊憾不斬爾萬段彥

舟並玠家屬沈之龍眼磯後人立廟磯上祀之案蘄州志玠長洲人高宗

紹興二年死節明一統志作景定閒疑誤

章燾字彥博宣城人孝宗時知蘄州為政寬平不擾蘄產竹篔

例充苞苴燾悉罷去

葉適括蒼人淳熙進士除太學博士朱熹為林栗所論適上疏言非是出知蘄州治務鎮靜入為吏部郎歷官侍郎世稱水

心先生

王彥明景定二年守蘄州元兵壓境彥明力戰以糧乏不支率家屬登舟中流鑿之闔家死州人立廟祀之



王益景定閒知蘄州政尚寬和開麒麟山立郡治案舊志王益之次有呂誨

通志有范純仁雖皆知蘄州然史不載其宦蹟宜刪

錢易字希白臨安人吳越王孫第進士太宗時通判蘄州上言

四方長吏競為殘暴非法之刑非所以助治請除之帝嘉納李誠之字茂欽東陽人嘉定閒知蘄州金人犯淮南選丁壯守城募死士迎擊遇於橫槎橋大破之居數日金人擁眾臨沙河欲渡又破之尋金兵大至蘄兵直前奮擊殺其帥金人攻益力圍城數重燔木柵誠之又殺其將卒數十人金使持書來勸降誠之戮其使越二日金人益攻具以進誠之設計禦之夜出擣其營會黃州失守援兵不至城遂陷率兵巷戰子士允力戰死誠之引劍自刎妻許及婦若孫皆赴水死事聞

贈朝散大夫封正節侯

案王志作慶元閒知蘄州茲從通志

秦鉅字子野江甯人通判蘄州金人犯境與知州事李誠之協力捍禦城陷鉅與誠之各率兵巷戰死傷略盡鉅歸署疾呼吏人劉迪令火諸倉庫乃赴一室自焚有老卒冒火挽出之鉅叱曰我為國死爾輩可自求生掣衣就焚而死次子浚與弟渾偕死教授阮希甫判官趙汝標錄事參軍杜諤都監嚴剛中俱死難各贈官有差時蘄春知縣林榮統制官孫中小將江士旺陳興曹全邱卞軍士李斌等皆鬪死

王霆東陽人理宗時知蘄州建學舍祠祀忠臣嘗貽書丞相杜範乞置瞰江三新城蘄春於龍眼磯安慶於孟城滁陽於宣化不報南宋書

甯時鳳字祥夫浮梁人蘄春主簿金兵寇黃郡奉李誠之檄助

城守死於難案時鳳一作蘄州通判

桂壁貴溪人以薦授蘄州判北兵徇蘄太守徐羿逸去壁歛歔

奮發申明大義率城中人日夜捍禦敵不能犯踰旬乃出奇

兵擊之圍遂解

汪安行績溪人高宗時蘄州教授學政嚴肅孝宗稱為樸直做

家老子遷知澧州案舊志州志俱作汪姓通志作江誤

李宗思乾道閒蘄州教授移建學舍切砥生徒朱子嘗稱其日

月有程不獵不惰非俗吏所及通志

廣濟縣

朱晞字子淵休甯人孝宗初知永安民立生祠改知廣濟請更

合肥之兵從之徙知靖州

一安德裕河南人太平興國中知廣濟軍時軍城新建德裕作軍

記及圖經三卷優詔加獎通志

孫構字紹先博平人進士廣濟判官歲舊入圭田粟六百石構

止受百石餘以畀學宮

元

史弼至元閒為黃州等路宣慰使盜起淮西司空山弼討平之

通志

劉魯字景文保定人守黃州三年政先學校復舊置四館以訓

諸生自是郡人蔡堅趙思義相繼領河南行省鄉解咸謂興

學所致

劉哈八兒元統閒涖郡政以德禮為先聲動江淮

案舊志此次有夏璿官黃

州行省都事查元史百官志黃州路無行省都事之官且並不載宦蹟宜刪

黃岡縣

吳汝字國棟饒州人至正閒以左丞戍邾城大水隄盡決汝悉

力載石巨舫塞之徐壽輝亂破邾下武漢諸城汝起兵復武

昌後飲黃鶴樓為偽漢兵襲破率其麾下渡江以圖興復不

克死之部將黃榮劉戶沈權等統眾還饒州明太祖與陳友

諒戰鄱陽黃榮以兵從榮稱戰時見汝白馬紅袍憑空助擊

乃勅封護國忠臣顯靈王邾民立祠祀之

縣志祀名宦

麻城縣

馬兒蒙任麻城達魯花赤襟懷軒豁政尚清簡暇日登臨山水

賦詩自適

樂九成蒙古人從字木魯子草學以世胄知麻城有政聲劉青

田云先生質粹而溫行果而毅學博而知要可想見矣

羅田縣

周廣宏農人大德閒知羅田以縣治在魁山下崎嶇不便民遷

官渡河至今仍之名宦

蘄州

張好古字信甫中統閒移戍蘄州李璫叛踞濟南宋人攻蘄好

古率兵迎擊力竭死之父晉亨在濟南軍中聞而哭之曰吾

兒死得所矣

案元史好古所成乃宿州之蘄縣非蘄州也詳通志存參

卜顏鐵木兒字珍卿唐兀吾密氏至正十二年徐壽輝陷湖廣

詔率軍討之十三年自池州戰勝進攻蘄州擒偽帥鄒普泰克州城進兵道士泐焚其柵抵蘭谿口時賊踞黃連砦為巢又克而殲之分兵徇巴河上下於是江路始通合兵攻蘄水拔其偽都獲將相而下四百餘人壽輝僅脫時諸將皆分道討賊卜顏鐵木兒獨控長江十六年卒生平廉介人不敢干以私常乘花馬時稱為花馬平章云

趙貧翁守蘄州有廉明聲通志

黃梅縣

樊懋旻直隸正定人皇慶九年任黃梅興學校課農桑有循聲始改建縣治通志

也孫帖木兒至正間任黃梅主簿時賊陷武昌舳艫蔽江而下

也孫帖木兒請擊賊江州路總管李黼大喜瀝酒與之誓急檄諸鄉落聚木石於險隘遇賊歸路倉卒無號乃墨士卒面統之出戰黼先大呼陷陣也孫帖木兒繼進賊大敗逐北六十里

明

陶安字主敬當塗人舉人少敏悟博涉經史尤長於易洪武初任黃州知府翦荆棘建廨宇闢田野均賦役逋民相率歸附李仁字守道唐縣人洪武間黃州知府性端謹言行不苟下士愛民廨宇壇廟學校倉庫皆經營創建媲美陶安

葉宗字承允永嘉人洪武二十九年以新化縣丞擢守黃州志量宏大決事如神泊行稱第一先是宗與靈壁知縣周榮宜

春知縣沈昌昌樂知縣于子仁並坐事逮訊部民為叩闕太

祖喜立擢四人為知府榮河南府昌南安府子仁登州府宗

黃州府由是長吏競勸一時多循良之績焉參明史循吏傳寶慶府祀名

宦祠

何晚齡漳州人洪武閒同知黃州有政聲就擢黃州知府廉明

果斷才能益著歷陞兩淮鹽運使卒於官反葬黃州蔡家潭

置有祭田詳家墓

滕霄字九臬汝州人永樂閒黃州知府在官十八年廉能清慎

政績最著其後註籍黃岡馬鞍山施建大興寺置墓田若干

石墓今在祥興灣屋後參通志

盛璞字玉夫宜城人永樂五年由國子生知黃州匹馬一僕不

攜妻孥警敏有才剖決無滯勢豪斂避

余清巴縣人正統閒知黃州持廉秉公政平訟簡軍民畏服比

卒囊無餘金黃人賻之乃歸

錢敏舒城人永樂閒知黃州興學校課農桑修城池葺公廨政

事文章為諸郡最

楊珏臨海人景泰閒以福建按察使左遷黃州知府勤於撫字

性直諒遠奸佞卒罹謗誣士民惜之

王霽字景明上海人成化閒黃州知府善聽斷有能聲境素有

火災與虎患江水嘗暴溢壞民廬至是害息九年賜誥旌異

參通志

謝恭字文安休甯人成化己丑進士黃州知府學問宏博居官

清苦舉廢墜興學校士民愛戴

劉肅字敬之嘉定進士黃州知府值蘄州宗藩弗靖監司倚肅為重卒賴以安屬歲饑賑救有方遷貴州參政

盧溶天台人進士宏治閒黃州知府廉明慈惠觀風各邑遇名

山水輒留題詠右文禮賢修府署毀淫祠時三江口有水妖

歲壞舟濬草檄投水中妖遂滅除水妖事詳據聞

胡錠字希曾長垣人進士正德閒黃州知府時值盜警督兵防

守歲饑急賑恤死者具棺瘞之理民事如家事

余貴縣人正德閒黃州知府為政寬猛適宜學校公署修飾

一新城內浚井二十餘處民用利之名曰余公井

楊最射洪人進士嘉靖閒黃州知府清介嚴明不避權勢凡乘

傳貴人並當轄差遣聞其風多迂道去徭役大省

吳淮鎮江人嘉靖閒由御史遷黃州知府簡重有為製文廟禮

器建號舍數十楹於東坡書院拔諸生茂異者講習其中一

時人才稱盛

郭鳳儀字舜符祥符人進士嘉靖閒黃州知府性清介不以家

屬自隨政尚平恕歲旱祈雨輒應郡人王廷陳嘗記其事

商廷試會稽人進士嘉靖閒黃州知府簡重有威馭吏尤嚴肅

無敢黃緣舞法者

張嘉孚鞏昌人進士嘉靖閒黃州知府耿介精明遇事立斷馭

吏嚴犯法輒抵罪舊有學田二區隱沒十年嘉孚燭其弊田

仍歸學

孫光祖慈谿人進士隆慶閒黃州知府治先教化明察善聽凡民瘼豪奸無不周知公餘與諸生論學不倦一郡以治

范可奇萬曆閒黃州知府增廓學宮訓課多士廣倉儲治道路築隄防並於江干設船救生隨所在施樁瘞骨善政甚多祀名宦

瞿汝稷字元立常熟人景淳伯子也以任子累官黃州知府每聽訟堂上手草爰書誦聲琅琅徹堂下訟者叩服時採木旨下他郡率役富民多破家稷獨給官緡董以衛弁民間宴如直指得其治狀為之歎服

王世德字迴溪永康人進士萬曆閒黃州知府宅心仁恕練達機宜尤留意人才與推官許士奇修葺問津書院擇師課士

人稱盛舉

案世德本黃州知府通志作推官誤

祝萬齡陝西咸甯人進士崇禎初以薦起任黃州知府興賢舉善木鐸徇路凡三載奸宄皆感格為良民嘗曰吾輩讀聖賢書奈何一領簿書棄之如遺因集兩學諸生於定惠院延儒士王家欽為師迪以正學學者稱為關西夫子後家居死流

賊難

參明史

許文岐字我西仁和人進士崇禎閒黃州知府值流寇擾江北文岐殺悍賊一隻虎奪大纛還擢下江防道駐守蘄州四年屢戰却賊突未張獻忠陷蘄被執不屈拘留之時舉人奚鼎鉉數十人同繫文岐密約被掠良民數萬期四月起義滅賊謀洩被殺事聞賜祭葬贈太僕卿詳明史

國朝乾隆四十一年

賜諡忠烈

安貞洪武閒任黃州同知守法不撓為奸吏訐奏被逮獄既成帝諭湖廣提刑官曰律在法司守法固宜貞佐郡所為朕訪之非其私也猾吏污蠱以報忿耳此風一長有司無官矣吏反坐

白范錢塘人黃州同知有善政

李仕魯字宗孔濮人洪武閒以朱氏學舉授黃州同知太祖曰

朕姑以民事試子行且名子矣期年以治行聞

明史作除知州

袁福徵華亭人進士嘉靖閒黃州同知時盜賊充斥深山窮谷身自搜捕境內遂安

薛一鶚字百萬定興人萬歷閒貢生任黃州通判荆王某姬誣

他姬醜世子一鶚白其誣奄人傳太如命欲竟其獄卒復之

後以蘭州知州家居殉難

嚴迪聰宜春人永樂閒黃州推官法紀森嚴鞠獄詳慎民以無冤

羅瀚豐城人宏治初黃州推官伉直有清操獄善求隱微多

所平反

朱節山陰人進士正德閒黃州推官性明敏不受私謁遇文士

雅敬重之

吳宗周安慶人進士嘉靖閒黃州推官練達有為深悉民隱樂

與諸生談論尋以憂去



崔孔昕賓州人進士嘉靖閒黃州推官剛方廉介門無私謁持

法不少貸公暇與諸生論文多興起者

佻鶴舉崇禎進士為黃州推官殉難

見明史

徐顯揚房縣人歲貢任黃州教授教士有方崇禎癸未守北門

城陷被執不屈死郡人收葬於石牛山

黃岡縣

徐誼字宜叔壽昌人洪武初黃岡知縣時太祖征陳理於武昌

誼作詩送使者曰紅旗招颶壓滄溟畫舸長驅上洞庭百萬

生靈新撫納九重天語自叮嚀猿啼山月灘聲咽鼉吼江風

水氣腥好語湖湘諸將帥漢家信誓重丹青太祖覽而壯之

加授承務郎時兵燹後邑里殘破誼撫綏流亡修葺廢墜庶

政咸理

胡潔豐城人進士正德閒黃岡知縣廉介有幹才其於民推心

置腹藹如也時御史督學命遷縣學於今址歲祲不贍潔為

區畫告成其他振飭類是累官至都御史

簡霄清江人進士正德閒白石首改黃岡知縣敏而文有遠猷

督修諸鄉隄壩為民永利累官南京兵部侍郎

虞儼丹陽人舉人嘉靖閒黃岡知縣明敏公恕不妄取一錢緩

徵省刑民至今思之

孟津字伯通丹徒人舉人嘉靖閒黃岡知縣不事嚴切而丰采

嶷然無敢譸張者退食正襟危坐雖家人不見喜愠之色

賈應璧字文宿無錫人進士隆慶閒黃岡知縣性清介有吏才

政尚簡要百姓安之累官按察使

羅應鶴歙縣人進士萬歷閒黃岡知縣勤於撫字尤好引掖人才推獎皆一時名士累官保定巡撫

趙士登字應庸涇縣人進士萬歷閒自武昌移黃岡知縣專務德化察民疾苦有不便即時除去聽訟片言立折奉詔丈田調停曲當邑人咸受其庇累官吏部侍郎

涂宗濬字吉甫南昌人進士萬歷閒黃岡知縣先是歲饑且疫流亡過半宗濬勤恤民隱興利除害豪猾膽栗民漸安集暇則與諸生論文後擢御史累官延綏巡撫邑人塑像與趙士登並祠

曹愈參字石清涪州人進士萬歷閒黃岡知縣儉約率下不事

繁苛訟獄衰息愈參母病篤士民相率禱於神數日果愈眾大喜其得民心如此累官河南按察副使

徐紹曾字衷耿海甯人進士萬歷閒黃岡知縣有魁盜夜殺人按之急遂調懇上官幾為移聽士民爭雪其冤賢聲益起會倭徭交警徵發不時又中使採摧來楚橫施荼毒紹曾極力捍蔽民深德之報最擢去行李蕭然陞兵部武庫司郎中

茅瑞徵字五芝歸安人進士初任泗水知縣有循聲萬歷閒知黃岡事勤恤民隱凡保甲賦役水利郵傳備極經營民感其德公餘手輯邑乘並赤壁集體例嚴明稱善本後徵拜御史去官至湖北副使著有象胥錄三大征記見明史

李希沆字鼎武慶陽人進士崇禎閒黃岡知縣清廉好士膽識

過人時流寇肆掠希沆嚴守備有警輒單騎佩刀先馳邑中  
義勇從之追逐披靡民賴以安

孫自一字澄如光山人進士崇禎閒黃岡知縣清介有惠政士  
民愛之獻賊之亂自一方解餉軍門及歸城陷乃與邑諸生  
王之經結寨大崎山保殘民圖恢復時亂離倥傯民有爭訟  
必取決賦稅輸山中無或後者會賊掠梅家湖自一率鄉勇  
五百人往救力戰死之賊退民求其屍面如生印猶在握因  
藁葬湖岸詳明史

國朝乾隆四十一年

賜諡節愍

韓秉文慈谿人舉人嘉靖閒黃岡教諭身範諸生不獵浮譽一

時名士咸資造就

武鉞來安人舉人嘉靖閒黃岡教諭丰度安雅博洽多聞遇貧

士輒分俸給之

張性魯當塗人貢生嘉靖閒黃岡教諭慷慨多大節遇事持正

論無所隱諱啟聖祠圯捐俸修建

周祿廬陵人貢生嘉靖閒黃岡教諭温文爾雅與諸生縱談名

理終日忘倦

姚溢汝陽人貢生嘉靖閒黃岡訓導性耿直事關學校輒力爭

之博學能詞賦有登眺詩云鄉心一雁遠時序二毛侵論者

謂其風韻迢逸

劉烜漢川人貢生萬曆閒黃岡訓導持守方正非孔孟之言不

道閒居無踞坐跛立嘗謂清貧二字為學者立身之要

林兆箕莆田人舉人萬厯閒黃岡教諭遂於經學集諸生課藝

寒暑不輟多所造就

吳文燮福建人明季黃岡縣丞獻賊之亂文燮分守南城晝夜

不懈城陷罵賊死之明史

國朝乾隆四十一年入祀忠義祠

杜遇春霍邱人永樂閒以人材任縣典史清節特著入覲緼袍

拜闕下成祖見而賢之擢為御史未幾以他御史誤軍糧事

並坐極刑後詔給葬求屍莫得乃葬其衣冠於縣東七里螺

螭湖子貴遂籍黃岡以上俱祀名宦

蘄水縣

胡奎鄱陽人舉人正統閒蘄水知縣邑有迴風磯當蘄湖大江

二水之匯常衝激為民患奎築萬工隄分障之立江神廟磯

上患乃息後知黃州七年政尚寬厚為民興利暇則訓課諸

生多興起者參通志

陳興許州人舉人成化初蘄水知縣閱九年公正廉明始終如

一吏咸畏法民不忍欺

黃鳳吉水人舉人宏治閒蘄水知縣性慈而剛催科無擾雖被

罰不恤也久之曰吾奈何以頭搶地乞靈貴人遂謝去

汪深進賢人舉人宏治閒蘄水知縣時倉儲缺乏乃籌畫倡捐

以勸旬月而六倉鼎然越再募儲粟二萬石歲歉民賴以生

曹遠太倉人進士正德閒以隨州判權蘄水知縣性廉明值武

宗南巡鄰省應協辦差事遠先期籍甲乙甚具絲毫無苛派民悉德之去任男婦操壺漿以送

蕭祥庚太和人舉人嘉靖閒蘄水知縣清廉儉約催科有法奏最得異等尋告歸大府徵之竟不出

閻士選江都人進士萬厯中任蘄水知縣時方清丈田畝士選與邑紳里老製弓格度肥瘠計便宜俟秋斂畢令民自為丈不假手吏胥欺隱弊絕更留心風化於蘄鄉賢中舉孝弟忠信禮義廉恥八行各以一人當之刊刻成書家諭戶曉俾人知所做法民風丕變

孫善繼萊陽人進士萬厯閒蘄水知縣下車值歲荒勸邑庠生楊永貫出積穀六千石富民黎朝臣捐金千四百兩以助賑

全活甚眾

杜長春字貞陽綦江人進士萬厯閒蘄水知縣懲奸罰惡不畏強禦清覈錢糧無欺隱包賠之弊每月課士評隲不爽人咸爭自濯磨

李汝璨字衡嶠南昌人進士崇禎時蘄水知縣性廉明洞悉民情吏弊值大造黃冊編審里甲稱平行保甲嚴更漏閭里帖然創置興賢莊田以贍貧士庚午癸酉兩次分闈得人最盛龔鼎孳字孝合肥人崇禎甲戌進士蘄水知縣值流寇猖獗鼎孳籌畫方略調度兵餉修城池登陴防禦不少休息賊勢少緩即進諸生講學好士愛民治行為全楚最

鄒應孝臨川人舉人崇禎閒蘄水教諭左良玉兵叛城陷罵賊

遇害

國朝乾隆四十一年入祀忠義祠通志作孕孝

童天申字祿所施州衛官籍由鄉貢授蘄水訓導流賊入蘄以身殉難贈國子監助教

吳文奔福建人蘄水縣丞彬彬儒雅有良吏風崇禎癸未流寇

至城陷遇害賊焚其尸於明倫堂

國朝乾隆四十一年入祀忠義祠

麻城縣

張谷維麻城知縣披荆棘立學校創始之功居多縣舊志祀名宦

趙乾歸安人洪武初麻城知縣有謀略善設施政聲丕著建廟

學文教振興後遂家焉通志祀名宦

胡琮蘇州人進士成化閒官御史謫麻城知縣勤撫綏修廢墜

雖風裁凜凜豪右憚之而小民皆得輸其情府志祀名宦

黃琮高安人有幹濟才民有去後思

高謙米脂人永樂閒麻城知縣為政勤敏民心悅服以上二人縣舊志祀名宦

高濂揚州人宏治四年任麻城知縣建漏澤園有惠政

王簞蒲臺人永樂閒任麻城知縣正直廉能折獄如神縣舊志祀名宦

聶賢字承之長壽人進士宏治閒麻城知縣凡大政疑獄諸司

所不能決者剖斷如流時有聶青天之稱累官刑部尙書

劉規字應乾巴縣人進士宏治閒以忤劉瑾謫知麻城政尙德

化有蒲鞭示辱之風二子相繼登第秩官表作成化任

劉溥字公濟安慶人進士宏治閒麻城知縣質實嚴明尤惡異

端悉燬淫祠以祛民惑以上三人縣志祀名宦

王世祿廣德州人進士正德閒麻城知縣先是縣河衝激為患

因開新河以殺水勢並建縣署民不知勞旋調任去

陳子文閩縣人進士嘉靖閒麻城知縣徵稅糧立條鞭法民間

稱便縣志注府志祀名宦

黎泮樂平人舉人嘉靖閒麻城知縣值歲稔盜賊蠭起白晝羣

聚劫倉廩泮杖斃為首數人仍令富戶平糶於是食足盜息

尚德恆南充人進士嘉靖閒麻城知縣置倉於岐亭便民輸納

修學宮建名宦鄉賢二祠後擢吏部去

蘇松廣安人進士嘉靖閒麻城知縣築河隄重建鼓樓修縣志

額退思軒曰清風亭

錢節用富順人進士麻城知縣萬曆初詔天下繕城垣節用計

公費均力役閱七月而城成通志案縣舊志祀名宦

文德字舜階涪州人進士麻城知縣德政稱最擢御史去縣舊志祀

宋一麟南樂人進士萬曆閒麻城知縣清蠹除奸人咸懷服縣舊志祀

鄧應旂進士萬曆閒麻城知縣縣志注祀名宦

戈允禮字敬輿保山人進士天啟閒麻城知縣愛民如子弊絕

風清在官八月以艱去前令文德有善政邑人至今頌之曰

前文後戈召杜同科

蔣煜字羽公武進人進士崇禎間令麻城鋤姦課士解繁決滯  
綽有吏才倡建書院置學田邑士至今蒙惠

貢安國富國人歲貢嘉靖閒麻城教諭日進諸生講學不倦嘗  
攝縣事清惠得民

詹景鳳號東圖海陽人舉人萬曆初麻城教諭以詩文名兼長  
書畫邑人士爭寶藏之著有詹氏小辨六十四卷六緯擷華

十卷見明史  
藝文志

蕭頌聖定遠人貢生崇禎時以麻城教諭署縣事癸未獻賊破  
城脅授偽官不屈自縊死

國朝乾隆四十一年

賜諡節愍

高公勺內江人嘉靖閒由歲貢任麻城縣丞政尚寬恕不銜聲  
譽傲裘羸馬自得也署縣篆有黠盜謀劫庫忽相戒曰恐累

高公遂散去

李體明榮澤人舉人崇禎壬午任麻城縣丞長厚寬和到任未  
久獻賊破城罵賊不屈死

馬人龍鎮算人崇禎八年提兵千餘守麻城遇賊滿天星等擁  
眾數十萬肆抄掠人龍同其將雷應乾爭前殺賊戰於陰山  
畝賊尸徧野會大雨賊四面環攻人龍應乾及所部皆死焉

國朝乾隆四十一年

賜諡節愍

石都司軼其名籍崇禎丙子禦獻賊沒於西門外



黃安縣

林葵大理人舉人嘉靖閒黃安知縣時邑治新設建衙署定規制寬嚴有體士民德之

李講清平人舉人嘉靖閒黃安知縣綜覈精敏吏胥多憚之而御民以寬嘗曰愚民非猾吏比偶犯小過教戒之足矣營建學宮力爲創畫有古循吏風

應存初浙江人舉人萬厯初黃安知縣憫民疾苦首刲條鞭法省一切經費而增城堞修學宮善政備舉復捐廉俸以資寒畯士林德之

秦煒容縣人歲貢萬厯閒黃安知縣歲稔盜起民多流離煒盡心撫輯窮鄉僻壤躬履周至獲盜輒懲之邑賴以安

李文芳向應賢俱四川人進士萬厯閒先後任黃安知縣聽斷嚴明清賦籍節夫馬治績相同邑人旣爲立碑建祠東關並崇祀焉

趙利珍滕縣人舉人明季黃安知縣督兵扼流賊親冒矢石屢立戰功賊相戒勿犯利珍撫循有術士民樂附

梁夢卜三水人崇禎末襄陽推官權黃安知縣邑新殘破撫字招徠遺黎復聚時軍興徵發不時夢卜以書諭山岩父老無不流涕急轉輸邑治燬於寇夢卜葺宇以居榜曰德風雖當倥傯之時猶躬親校士首拔張希良咸以爲知人後罷官卒於漢上

郝景春江都人舉人以府照磨攝黃安篆甫三日羣賊奄至堅

守八晝夜賊解去擢知房縣卒死於難明史忠義傳

黎汝謨羅山人舉人萬厯閒黃安教諭剛方正直師範尊嚴久

悉吏胥弊實後攝黃安篆取巨蠹數人置之法時論快之稱

神君云

黃元春新建人舉人崇禎閒黃安教諭工詩古文日與生徒論

古今成敗不輟著有青萊文集

周天造莆田人吏員嘉靖閒任黃安典史時邑新設佐修城池

葺公署招商賈通貨財邑中至今享其利

羅田縣

龐敬嘉興人舉人正統閒羅田知縣律身廉介泣政嚴明壇壝

鋪舍祠廟捐貲建置不憚經營祀名宦祠通志

徐泰字士亨江陰人舉人景泰閒羅田知縣清廉仁恕督課農

桑創便民倉以備荒歉邑距江遠漕米轉運維艱泰買蘄水

巴河地建倉數十楹置附近田數十畝為歲時修繕費民咸

稱便通志作初任祀名宦祠見一統志

羅勳四川永州人宏治閒進士任羅田知縣清靜簡易重儒勸

學頗著賢聲

勞樟崇德人舉人嘉靖閒羅田知縣性剛直雖大府不能撓徇

凋敝後稽賦懲奸時無猾吏亦無冤民始修石城新學宮皆

身親督理民樂趨赴祀名宦祠

祝珮縣志作翊蘭谿人舉人嘉靖閒羅田知縣纂有羅田縣志八卷

並序見鄞縣范氏天一閣藏書目錄

凌嗣音烏程人進士隆慶閒羅田知縣潔已愛民恤獄囚改監所邑人懷德爲祠祀之

李一陽歸安人舉人性純孝好學萬厯閒羅田知縣公暇披吟不輟選邑子弟有文行者讀書署內造就頗多

梁志仁江甯人舉人崇禎七年羅田知縣八年羅汝才分其黨攻城城陷志仁巷戰手刃數賊勢孤被執迫之跪罵曰我天子命官肯屈膝爾賊耶賊支解焚之妻唐奪刃殺賊不得噉賊手亦被殺汝才聞之馳至斬其別校曰奈何擅殺長者以錦繡殮其夫婦事聞贈蘄州知州

明史

國朝乾隆四十一年

賜諡烈愍

白乃忠字邇事江津人舉人梁志仁旣殉節乃忠任羅田知縣時邑里殘破井野蕭條乃招集流亡謀於眾曰賊氛未靖守禦當嚴募民有勇力者分爲七營簡閱練習步伐整齊賊至躬冒矢石輒擊敗之民獲安堵復於戎馬倥傯時重修邑志才兼文武在任五年治績丕著

陸敏烏程人宣德閒羅田主簿廉正勤敏在任五載巡按稱最祀名宦祠

齊錕臨漳人宏治閒羅田主簿淡泊渾樸任事明敏嘗權知蘄水吏莫敢欺祀名宦祠

李儁縣志作鑑大理人嘉靖閒任羅田主簿時賦役煩興不妄施鞭扑值例應朝覲郡縣先期啟行儁檄獨後至人皆憂其無備

乃即日匹馬就道無所顧慮卒於京祀名宦祠

陳璉南昌人舉人宣德閒羅田教諭潛心理學善解經旨應陝西鄉試聘入闈所取多知名士在任九年陞鎮江府通判祀名宦祠

吳鳳來福建人舉人任羅田教諭盧大受寶慶人任訓導單思仁任典史崇禎乙亥流賊陷城知縣梁志仁既被害鳳來大受思仁齊赴難同時死之詔贈鳳來國子監助教大受學錄思仁羅田主簿廕襲有差見明史

國朝乾隆四十一年均入祀忠義祠

案縣志鳳來大受均稱祀名宦祠

吳時俊彌勒州人任羅田訓導有氣節崇禎時送郡試回至江家山遇賊殉難

李鯤騰陝西人崇禎閒任羅田訓導重名義端表率值土匪倡

亂命長子率義兵進勦遇害鯤遂以憂卒

郭金城四川人崇禎末為羅田守將賊逼城率所部五百人大戰斬百餘級追至英山休州坂賊大集困三日力竭被執脇降不屈遇害祀名宦見明史

國朝乾隆四十一年

賜諡烈愍

蕪州

夏元吉字維哲湘陰人進士以戶部侍郎充採訪使尋鎮蕪州

州人祠祀之

州舊志

周美字濟叔崑山人進士嘉靖閒擢下江防兵備僉事廉介沈

毅熟精兵法蘄舊有盜艇剽劫商民美立團操法造戰艘令材官日巡江上獲盜獄成卽懲之盜由是不敢犯境馭下嚴肅暇則教課諸生頗多成就去任日蘄州物產一無所攜侯堯封字欽之嘉定人以御史出僉楚臬治蘄州潔已愛民清盜有法甄其父兄各約束其子弟嘗仿朱子遺意設社倉五十餘所又建飛梁於掛口築新生磯舟行者得無恐蘄人肖像關聖祠祀之

韓孫愛字君溥慈谿人進士累遷江防參議執法嚴明課士興學修築江岸浮玉磯蘄人肖像祀之

吳國仕字長谷歙縣人進士隆慶閒任下江防道推誠愛物捐俸數百金建文昌閣於浮玉磯置祀田二百石兼賑士之貧

者歲以爲常士民德之爲立報功祠

張秉貞字坤安桐城人進士任下江防道時流寇踞地擄掠秉貞親至渴口勦之賊遁民賴以安

王世德字迴溪永康人進士任江防道有惠政增築文昌閣磯勤於課士著有麟鳳會業並祀報功祠

左安善洪武初蘄州知府創衙署興學校公勤廉潔惠政及人王坦字子平鄆城人舉人正統閒蘄州知州政尙寬平訓士愛民歷久不渝

莊轍字仲輿上元人進士正統閒蘄州知州廉介有爲建明倫堂樂育堂貯書樓以教育諸生時劇盜逼境兵民有被害者

優恤其家通志作成化時任

錢承德常熟人進士何綸順德人舉人先後任蘄州知州有善政至今並稱

葉仕美閩縣人舉人正德閒蘄州知州時流賊犯境仕美單騎招集守禦城賴以全

李純字在誠莆田人進士正德閒蘄州知州潔已愛民遇事能斷豪猾無敢逞者

石璽滁州人舉人嘉靖閒蘄州知州荆王常洽淫暴惡璽璽因祈雨詭令知州接雨跪烈日中須臾雨驟至平地水深尺許不令起璽密疏陳狀詔奪王爵廢為庶人

潘珪字玉字婺源人成化閒令蘄水架梁建倉多善政宏治閒任蘄州知州創阜民倉踰年大旱民賴以濟自是益廣倉廩

積粟至八萬餘石在任十年政行化洽參通志

鄭夢禎福建人舉人萬歷閒蘄州知州剛正不阿時太監陳奉開採銀礦檄夢禎監稅夢禎極言不便大拂奉意奉劾之並

及江防參政沈孟化遂降調去州人惜之徐希明上虞人萬歷閒蘄州知州江中有石磯為舟患希明築

基建亭於上名曰浮玉行者得以趨避通志錢兆元字長人仁和人舉人天啟閒蘄州知州每聽斷必焚香

告天祈免冤抑暇則進諸生講課時三王之國供用浩繁兆元廉敏強幹務以身先民得無擾擢辰州同知泣送者萬人

通志作萬歷閒任

唐世照字伯闇灌陽人舉人崇禎末蘄州知州性明敏習勤勞

流寇隔里眼竄踞青山鄉民多流離世照於附城通衢掘濠築險分住流民日夜巡警寇不敢窺尋以勞瘁卒

傅舟永樂閒蘄州學正學問淹博應詔纂修性理大全

林宗字存敬莆田人天順閒蘄州學正課諸生晨夕察其勤惰

諄諄誘掖咸出至誠州人建祠學宮祀之

陳策江西人貢生萬厯閒判蘄州黃梅賊首梅鏜詹三漢倡亂

入州境踞柴家山策從知州徐希明會官軍勦賊策奮勇突

賊巢賊鉤之遂被執脅降不屈死之

封繼榮廣西容縣貢生任荆藩紀善時荆府幾務繁允榮因時

措置井井有條為諸王所倚重子良儒益藩教授父子俱以

詩名

廣濟縣

胡昇字高軒新淦人舉人洪武初廣濟知縣闢榛莽招流亡百

廢俱興九年秩滿士庶戴之詣闕乞留太祖降勅褒美後遂

家焉萬厯癸丑崇祀名宦祠

高偉浙江人進士永樂閒廣濟知縣有政聲一作正統閒任

劉遜館陶人舉人正統閒廣濟知縣平易端恪卒祀名宦子受

欽遂家焉

陳昱浙江人監生正統閒廣濟知縣政清嚴吏不敢欺節省民

財事亦克濟三年致仕歸

杜燉蘭谿人舉人成化時廣濟知縣惠政及民廉介自守尋調

上元民遮道留之

江震錢塘人舉人成化九年廣濟知縣文章政事為時鄭重後官至吏部侍郎

陳奎南昌人進士宏治閒廣濟知縣心存仁厚政有條理遷儒學於縣署右絃誦丕振尋擢御史累官廣西布政使

葉溥龍泉人進士正德閒廣濟知縣洞察民隱誠心蒞政無赫赫威而吏不敢欺尤作興學校賓禮韋布有長者風表作宏治任

汪倬貴溪人舉人正德閒廣濟知縣時鄉民流徙田為蕪人所侵民多賠累倬請於朝凡得田者即編隸焉民賴以蘇

楊阜字弇西宜興人舉人嘉靖閒廣濟知縣初邑無城市至是聚居民貿易成街曰楊公街又曰玉帶街建八門鑿九井西北有池曲轉又改河流繞縣右接梅浦清流塞舊河口以培

地氣創凝秀橋以關下流迄今水道環流民稱楊公績焉以上

俱祀名宦

姚翼字翔卿歸安人歲貢萬厯閒以黃郡教授任廣濟知縣清編戶正昏禮聞布衣吳自守敦崇古道單車造廬訪焉邑大治

劉允昌字燕及桐城人萬厯閒廣濟知縣敏練有為大吏重之疑獄多屬其聽斷他邑爭以訟來乞決斬豪鄒長武斷殺人昌拘而斃之時獄司吏徐某下通書吏為奸廉得詳治之建滄浪橋修梅浦閘又樹碑前賢墓為寇山人營葬崇祀孝子闡發幽光一邑向化

周驥江津人崇禎初以鄉舉任廣濟知縣吏治勤敏左右無敢



黃州府志卷之十三  
欺者徵比以單爲率法歸畫一鄉民皆得自輸里胥無能作  
弊至今法之租賦皆手冊細書一目可曉靈東四圖宦米居  
半黠者憑焉多爲欺隱驥集諸書吏核校飛詭諸奸狀搜剔  
無遺

張登衡字埜心桂林人舉人崇禎末以蜀令移廣濟知縣招集  
士民於大江洲上防禦流寇胥吏素憚威嚴思乘亂爲不軌  
歃血私盟立營以義勇爲名士紳偵知恐變作約洲民立保  
定營以防之衡宴然若弗聞者時天旱步禱諸奸見久無督  
過意衡出必隨後行香江北廟奸黨皆從衡預與保定營長  
密計忽鳴鼓督眾擒其魁數十人投江中餘黨以靖通志  
梁文崇化人歲貢嘉靖初廣濟訓導品行端正有古人風培養

士氣訓誨不倦嘗捐俸新兩廡並資助寒畯士人德之

陳道濟南康人舉人中禮闈副榜萬厯閒署廣濟教諭在任三  
年鼓舞多士初道濟居廬山麓以茂才異等選入白鹿洞讀  
書同時士人奉爲嚴師焉

曾發祥字穀鍾祥人以明經任廣濟教諭崇禎乙亥流賊圍  
濟發祥協力堅守城陷不屈死賊焚屍於明倫堂

樊守純

通志純作仁

西平人萬厯四十一年爲廣濟縣丞有幹略邑

自戊申江水破隄癸丑再決委守純修築由盤塘至龍坪接  
黃梅壩六十餘里計租起夫立期赴工畚鍤杵築悉有程度  
王素樂平人洪武時以掾爲廣濟典史好讀書公餘習舉子業  
至夜分不倦中湖廣鄉試士大夫榮之

魏時光新建人崇禎九年任廣濟典史善舞雙刀團練排兵三百人赴蘄州高山鋪禦賊賊至河口憚不敢渡已而賊閒道掩至時光匹馬揮刀與賊鬪賊環攻之韌斷被執不屈死事聞贈廣濟主簿予卹詳明史祀名宦

國朝乾隆四十一年

賜諡烈愍

黃梅縣

黃武歸安人金章上元人進士先後任黃梅知縣有善政案金章舊

志作金元崑山人今本縣志

戴中新淦人成化閒黃梅知縣持身清潔莅政明敏修學宮葺官廨建倉儲穀凡有廢墜慨然興舉梅人德之

來三聘蕭山人進士萬厯閒黃梅知縣清介愛民徵收革除火

耗有羨餘卽充解費期年後調任合肥梅人乞留不得有疑

獄輒裏糧往訴決判訖卽鈐合肥印故當時有黃梅案牘合

肥印之謠邑人思之建祠東關外

桂生芝貴溪人舉人萬厯三十六年黃梅知縣值大水衝隄邑

民半罹水患生芝多方拯濟先給銀米繼以請蠲請賑請建

隄工派丁糧民皆趨事遂成永利稱桂公隄時獲真盜輒投

之水故歲荒民得安枕

武圖功曹縣人進士萬厯閒任黃梅知縣治尚清簡獄無大小

情偽盡知當時有肺石無冤民之頌百姓請祀名宦並建特

祠

曾維倫樂安人進士萬厯閒黃州推官權黃梅知縣下車問民疾苦旌善良翦凶暴學宮及壇廟城垣修葺一新自濯港至孔隴地最低下維倫捐資築隄四十里民賴其利  
施廷賢浦江人黃梅知縣崇禎十七年獻賊陷城巷戰被執勸降不屈自刎死

國朝乾隆四十一年

賜諡節愍

沈鏞平湖人嘉靖閒任教諭有雋才入名宦

蕭廷儲廬陵人嘉靖閒任教諭爲人醇謹遇事出以平恕善類賴之入名宦

顏樸廬陵人舉人嘉靖閒任訓導學問淵洽訓迪嚴正有古人

風後祀名宦

席慤四川人嘉靖閒任訓導敦行勵節軫恤寒士當事賢之後

祀名宦

闕士琦字褐公桃源人天啟甲子舉人署黃梅教諭博學工詩文在任三載日夕課士沾丐餘芬者皆成彬雅著有桃源索解郎當草捕鯉堂稿蟊螟集行世後甲戌成進士官南安知縣

國朝

郭鳴鳳任邱人順治閒黃州知府潔已奉公愛民如子歲旱祈雨輒應復值年荒施粥賑饑一郡多所全活尋陞本省興屯道

余三汲遼東人初任黃州同知持廉秉公百務具舉尋陞本府知府未匝月移守武昌郡人如失慈父母

于成龍字北溟永甯州人副貢由知縣歷官岐亭同知黃州府知府康熙十三年東山賊起眾號十萬將逼郡城成龍率鄉勇二千人進勦計誅賊首得賊名籍焚之脅從解散餘黨悉平次年大饑振卹活數萬人性剛嚴明決疑獄重案判斷如神積盜皆斂跡時討吳逆大兵雲集供軍需並有功尋以卓異陞任去位望日隆卒諡清端郡人建祠至今祀焉並祀名宦祠

李彥瑄字輯五三原人順治丁未進士由中書官黃州知府嚴正率屬革除陋規清查積貯歲荒民賴以濟蒞任十年嘗置

屋數楹舍止羣吏彥瑄既沒乃葺作祠宇迄今奉祀李公歲

時唯謹後祀名宦參册案

舒士貴大興人監生康熙間黃州知府舊例行戶由府給牒猾吏藉派累民士貴廉得其弊但取完額餘俱革除刊碑永禁歲早禱雨立應以疾卒於官祀名宦

蔣國祥鑲藍旗人監生黃州知府潔已奉公恤民好士雍正二年撥公田稞百八十餘石為義學束修膏火之資本詳學校志

王繹曾宛平人貢生乾隆初黃州知府廉介有為二年改建黃中書院修葺學宮本建置志

王勅鄆縣人拔貢為關中理學名家乾隆十二年授黃州知府蒞任數年激厲風化政治昭明尤留心文獻與岡邑庶常靖

道謨纂修府志體例詳核至今奉為楷則本志大序錄

李琚字君采靈州人進士乾隆十七年擢任黃州知府甫下車清理積案塵牘一空遇疑獄片言立折先是任蘄州值奸民馬朝柱謀逆泌偵知躬親捕治獲其器械及偽印劄按名翦除兵不勞而事定郡邑肅然敘軍功得擢任事詳州志

錢鏊字檢亭常熟人舉人乾隆間知蘄州新書院增學田纂修州志勇於有為尋擢黃州知府葺官廨增號舍修書院補城垣善政甚多詳州志黃岡志

儲祕書字玉函宜興人乾隆間進士累官黃州知府儒雅風流士民欽仰著有緘石齋詩稿評者以為素練輕縑雅宜時用兼工倚聲見 國朝詞綜本湖海文傳補錄

先福正白旗人附生乾隆五十五年黃州知府儒雅清廉聽斷明決重新雪堂修建月窟軒公暇輒吟咏其閒詳建州志

吳之勳海豐人進士嘉慶九年任黃州知府修廨署築隄防甲戌大旱之勳率屬走籲百神暴身壇所會大府下郡縣禱雨法須節婦鏡一枚對日設案磨墨潑其上誦咒抹勻誠求必應之勳訪聞郡城南許希曾祖母殷母氏李兩世貞節以禮借鏡置壇如法虔禱甘霖立霑命鼓樂送還作靈鏡頌紀之

詳藝文志李光庭字樸園寶坻人道光初黃州知府聽斷明決政理刑清未久以病去任黃人思之

周維垣簡州人進士道光間黃州知府多惠政士民感戴

邵勤陝西人進士道光閒任黃州知府才學兼優戢暴安良尊  
崇儒術人稱賢太守

楊庚字少白號星山江安人以拔貢官工部出爲黃州知府禮  
士愛民常晨詣河東書院會諸生講習娓娓不倦士風爲之  
一振捕蝗祈雨事事皆勤懇爲之在任五年引病歸留別詩  
有茶村詩卷壓歸舟之句著有星山小草行世

徐上鏞字蓉舫歙縣人進士道光閒黃州知府圭璧束躬政存  
大體著有吟梅館課行世

萬貢珍字荔門江西人進士道光閒以編修任黃州知府明敏  
有爲甫下車適岡邑詳命案斃四十餘人貢珍提訊按律原  
情辦理稱平官民無累方議改建書院修塔濬河以培植地

方尋遷擢去士民懷之

祁宿藻字幼章壽陽人進士道光閒以檢討任黃州知府廉明  
敏決愛民息訟麻邑某與兄嫂爭產構訟不休宿藻爲判詞  
累千言論之叔嫂皆感泣去喜培植士林增書院膏火每課  
藝講解若嚴師值歲早親詣大崎山禱雨甫三十里甘霖立  
霈民情歡洽去任郡人攀留不忍舍咸豐二年累擢江甯布  
政使值粵賊下竄防守金陵積勞致疾卒

楊福祺字子厚歷城人進士道光庚戌以編修任黃州知府性  
清介而政不苛留心文學士民頌之

邵綸浙江慈谿人進士岐亭同知咸豐三年春廣濟土匪宋觀  
佑等因糧滋事知縣蔡潤琛不能制力求去時綸署府事檄

黃梅知縣鮑開運兼攝濟篆會帶兵勇往彈壓觀佑等陽受  
撫不三日糾其眾入城肆殺掠綸及開運均遇害同時死事  
者團風巡檢蔡文熙陽邏汛把總魯光貴道士汛營把總賈  
加升及兵勇書吏丁役等一百八十餘人詳見武備志  
金雲門字菊僊休甯人進士累官至安陸府知府所在有政聲  
初任黃岡繕葺城垣復名勝古蹟重修青雲塔爲郡邑壯觀  
聽斷明決士民稱頌咸豐三年移署黃州知府九月粵賊由  
廣濟上竄孤城無援時府署已經兵燹移治考棚雲門聞警  
朝服坐大堂作詩二章云笑赴清流死泉香骨亦香滿腔餘  
熱血泉下侍

先皇命婦投繯日雙珠爭後先泉臺忠烈魄相待已經年未幾賊入

城至堂堂下有井雲門手劍禦賊且格且行及階投井死郡  
人後呼爲金公井先是二年冬賊由湖南竄陷鄂垣時雲門  
防堵通城妻汪並二女寓鄂垣殉難故詩中及之事

聞贈太僕寺卿准建專祠謚果毅旌卹並如例

許賡藻字枚卿孝豐人舉人明決有爲道光間令黃安洞悉民  
隱咸豐時粵匪肆擾賡藻督團練議堵勦邑人士樂爲之用  
屢著戰功丙辰擢守黃州時逆燄方熾賡藻籌辦軍需勞績

益著

詳黃安志

黃益杰字子山平江人附生咸豐辛酉以軍功擢黃州知府耿  
介有爲勸民息訟力除積弊時承兵燹後文廟學宮試院百  
廢俱興同治乙丑冬捻匪擾境益杰率士民登陴固守指數

干縉賑附郭饑貧疏濬濠隍城賴以全郡人於大士閣建生祠益杰峻拒之乃稱為黃公講院

白秉真字懿生奉天杏山人貢生順治初黃州府同知斷事明決遇物慈祥一郡歸心時東山屢不靖秉真請勦撫兼行四閱月遂平定四十八砦

宋學字牧仲商邱人康熙三年由廕生授黃州通判事母純孝築將母樓於署朝夕承歡時當西山征役後民力凋敝多方撫恤嚴行保甲盜賊遠遁施散衣藥作育人材捐俸修復雪堂竹樓墨池崇祀先賢在任六年以內艱去百姓呼號送之後官至吏部尚書加太子少師卒年八十賜祭葬如例生平著作宏富有西陂類稿四十六卷祀名宦子至翰林授

浙江提學參文獻徵存錄

鍾黼字辰臣浙江人道光初武黃同知廉靜寡欲培植地方武穴向無義學黼捐俸倡修延師以訓蒙士去任時士民夾道

爭送本廣濟志

李炳奎字石筠夾江人舉人道光閒武黃同知在任數年日以文詞課士殷勤不倦創立書院屢為修葺本廣濟志

丁期昌安邑人順治初推官精律例多所平反舉廉官第一通志王絲合肥人順治閒黃州推官斷獄明慎每定爰書至忘寢食臺使決讞多委任焉

彭士商衡山人進士雍正初黃州教授品行端方情殷課士究心宋學重建二程祠為後儒矜式本黃岡建置志



曹浦蓮枝江人幼穎異嘗多病因字曰靜軒每讀書清坐默識  
細繹義理遂貫串六經以能文稱年六十始舉於鄉旋成進  
士道光閒任黃州教授持已訓人皆從主靜做工夫郡人賴  
成就者甚多閱十九年告歸手植桐樹高數丈許著有桐茂  
堂稿黃岡童範儼鄧琛及門士也梓而行之

王德新字菊門江夏人舉人道光閒黃州訓導教士嚴謹師範  
凜然曾手輯黃岡志稿知縣俞昌烈續修邑志一循其例工  
詩古文詞著有葆醇堂稿行世

王兆春字梅岩孝感人舉人道光閒黃州教授性耿介學養兼  
到年七十餘猶吟誦不輟咸豐七年告歸道遇賊避水次賊  
躡之長子少岩奔救身沒於河人稱其孝次子嘉喆同治辛

未進士

賀壽憲號儀臣蒲圻人拔貢同治七年官黃州教授性爽直無  
城府培植士類不輕褫一衿遊於門者咸知以禮法自飭賓  
僚接見或涉公事絕口不一言至耆宿雅故者則談讌竟日  
夕無倦容工書法晚尤蒼勁求請者泚筆立應焉光緒八年  
監修邑志明年復監修郡志邁疾卒年六十九

張大治遼東人順治十一年鎮黃州紀律嚴明素未讀書凡疏  
劄令幕客口誦入耳卽解愛民下士有儒將風

李占春陝西人康熙初鎮黃州善飯有勇樓季之城能距而趨  
每夕跳城外察墩卒馴擾雖圍人不敢犯蔬圃卒於官身後  
蕭然五子皆貧莫能振

王宗臣浙江人氣質雄偉歷官戎政以恤兵愛民爲念滇黔川蜀之間皆著奇績康熙五年授黃州副將優恤士卒賞罰嚴明士民無不戴德辛亥歲大饑捐俸賑濟全活甚多未幾江右告警領兵赴蘄西援湖口親駐江干多方捍禦積勞成疾卒事

聞贈左都督予祭葬廕子麟紱入監

穆克登布字熙齋正黃旗蒙古人咸豐十一年由施南副將調黃州廉潔謹慎曉暢營務黃郡迭經兵燹穆克登布厲士卒招流亡軍民共戴時公解久燬構屋數楹一官一榻布衣蔬食宴如也後調任去郡人士焚香餞送有泣下者

李宏試字月卿清泉人咸豐閒從大軍援勦髮捻克復黃州府

城累戰功階至 記名提督同治八年借補長江水師田鎮協營副將時水師始分汛宏試蒞任修衙署置操場設火藥公局整飭戎行勤練士卒並於廣濟蘄州置田收租永爲本營獎卹之費賞罰嚴明轄境安謐他如捐修廟宇施棺瘞骸有善必舉光緒五年卒於官

黃岡縣

楊日昇字白石富平人舉人順治初黃岡知縣招撫流亡薄稅省刑民漸歸附時伏莽未靖昇與副將唐國臣討平之壬辰歲旱禱雨立應素性清介囊橐蕭然猶捐俸賑饑民賴以濟劉國甯字漢章奉天人廕生順治閒黃岡知縣催科有法草一切陋規邑當水陸衝兵差絡繹國甯每單騎往迎民以不擾

城內多火災預置救火器具有警輒以身先之時年僅弱冠

邑人稱神君云

參通志

徐攬字亦史吳縣人舉人康熙初黃岡知縣愛民息訟捐金救災修建學宮興復古蹟文物燦然著有吳邱五集寓黃小阜書法亦工黃人謂以文學為吏治者必首推徐尹焉

董元俊華陰人進士以經術起家任黃岡知縣悉罷朘削之政條教一新訟獄衰息舉卓異時方草創邑志未成以憂去後令李經政繼之亦著賢聲

以上縣志俱祀名宦

劉澤溥字惠菴漢軍正藍旗人康熙閒黃岡知縣端方耿介培養士林捐俸置田撥入問津書院重修上新河橋建亭曰觀瀾後陞任去士民刻像嵌赤壁

樊大元字咸巖夏縣人舉人雍正初知黃岡清廉溫厚不輕敲扑培植人材尤留心寒畯在官一年以案盜失出罷行李蕭然邑人送之多泣下

陳文樞上元人副貢乾隆二十二年由教習任黃岡知縣以廉能稱嘗擴新考舍籌備書院修餼儲書籍以資考訂捐建問津書院講堂邑志年久未修前令劉煜倡捐搜輯已擬例分門文樞接篆續編未成陞任去後令蔡韶清竣其事

葉世度字涵齋仁和人乾隆二十六年由庶吉士改黃岡知縣廉靜寡欲為政務持大體嘗言正人心厚風俗求之刑禁閒左矣加意人才公暇輒詣書院進諸生講論口授指畫如家

塾師

史湛字澹然餘姚人貢生乾隆四十六年以岐亭同知攝黃岡知縣先是吏胥舞法每值驗勘百端需索民甚苦之湛加意釐剔積弊悉除時有史青天之稱

王正常字方山瀘州人舉人乾隆五十一年任黃岡知縣振風紀鋤奸頑斷案畢剴諭兩造如家人語民感泣相戒勿輕瀆丁未旱祈雨立應蝗起迴龍山為文禱劉將軍廟越二日有雀幕天而下啄食殆盡時士人為作神雀頌戊申大水預籌賑撫民無蕩析次第修建文昌閣二程祠江神廟及團風漕倉百廢俱興尤培植學校增河東書院膏火公餘輒親臨講藝在任七年以治行第一陞山西郡丞

汪慕鍾字潔亭臨桂人吏員嘉慶十二年由蒲圻縣丞權黃岡

知縣性謹厚不務繁苛每值勘驗減騎從省釋株連民多德之

關維紀臨桂人嘉慶戊辰知黃岡潔已愛民尋遷去民乞復任道光辛巳再莅任振拔人材作興書院邑人至今思之鄭家屏字葵圃灤州人廩生嘉慶十六年為黃岡知縣性剛毅以培植地方為念邑巽峯向有四望亭久圯家屏糾貲重建適癸酉鄉試獲售八人拔萃優行副貢又六人家屏捐建多士坊於縣學前以誌其盛倡議修塔疏河工鉅未就而去二十四年復任政如初以疾卒於官值

仁宗賓天家屏遺屬素服斂家人以公服弗瞑改斂乃瞑

郎錦駿字牧雲代州人副貢嘉慶二十五年權黃岡知縣清理

積贖甫半月訟繫一空廉知稔惡奸民急捕治之闔邑稱快  
為河東書院勸輸追欠得二千餘金以充膏火故邑中多絃  
誦聲暮年去任士民餞送塞途力謝不能止也

蔣祖暄字晴山全州人舉人嘉慶二十二年由羅田調署黃岡  
知縣時大旱羅民潛往大崎輦龍神去岡民爭之匿弗與兩  
造洶洶聚至萬人訴於官祖暄馳往羅民爭拜馬首祖暄委  
婉開導仍昇神還明年又旱暄徒步往禱得大雨有崎山禱  
雨記政尚簡易慈祥剴切吏畏民懷咸尸祝焉

李錦源字蓉艷犍為人進士道光九年任黃岡知縣性仁厚縣  
試所拔多知名士倡捐景聖堂義學邑中效之者十數處延  
前令陸炯府訓導王德新纂修邑志值辛卯水災事未竟旋

解任去

范興榮字仲華普安廳人舉人道光閒黃岡知縣潔已愛民培  
養士類有古循吏風尤善聽斷折疑獄多奇中民以不冤知  
府楊庚深倚重之以卓異陞鹽提舉去行李蕭然邑人稱范  
青天云

俞昌烈字鴻甫大興人監生道光二十六年任黃岡知縣聽斷  
明決前令李錦源集貲修邑志編輯過半值水災中止至是  
勒成全書去任寓省垣咸豐二年粵匪陷鄂昌烈力刃數賊  
死之闔家殉難得卹祀省城昭忠祠見節義錄

翁汝瀛字蓬山鉛山人舉人咸豐三年任黃岡知縣慈惠得民  
心有禦變才時粵匪擾黃汝瀛至西北鄉練勇攻勦每戰輒

克明年九月汝瀛率勇先官軍克復黃郡五年元日制軍楊  
需兵潰廣濟奔馳過黃檄令集勇遏賊上竄汝瀛率二萬餘  
人尾追至漢口令曰火之無遽入眾輕敵鼓譟爭前遇伏大  
潰汝瀛陣亡紳民從死者數百人事

聞贈知府銜卹如例

葛致遠字毅山畢節人舉人究心經世之學兼習壬遁風角術  
以揀發來楚咸豐五年春粵匪上竄黃岡知縣翁汝瀛陣亡  
大府遴委攝縣事致遠閒道徒步至李家集招勇團防越日  
賊大股抵倉埠致遠邀擊於井字山身先陷陣團勇繼之擒  
斬甚眾悍酋范潮蘭率所部降兩年大小百餘戰所向有功  
時方倥傯而治獄徵賦皆無廢事郡城克復卸篆去黃人思

之

薛元啟字雲錦泌陽人咸豐九年黃岡知縣剛方正直有幹才  
猾吏屏息治盜嚴而勤恤民隱聽斷無冤時軍需旁午咄嗟  
立辦會巡撫李續宜移師安徽奏調元啟隨營遂解任去  
孫芝瑞江夏人貢生康熙閒黃岡訓導事父以孝聞教士有法  
度事關學校者力爭之為時所重

李敦柱字槐亭江陵人舉人乾隆五十二年為黃岡教諭學深  
養粹古今文皆有體要教養寒畯造就良多倡修名宦鄉賢  
忠義節烈諸祠並東關外忠顯廟刻有鬱林石稿二編士人  
傳誦

程之楨號維周江夏人舉人大挑知縣改官黃岡教諭時兵燹

後院宇學舍皆民間輸金重修植董其成無毫髮侵蝕故事士甫遊於庠謁學官以束脩進權家資為輕重植言之輒赧然意不樂受也得度外之士則姁姁引進如飢渴之切已清俸所積悉以購書史手丹黃不倦喜為詩取法梅村高者比肩大厯著有維周詩鈔八卷兼工書畫書摹真卿畫仿思肖卒後遺墨黃人士至今寶弄之比之鄭虔三絕云

李景唐奉天人貢生康熙六十年任黃岡縣丞有聽斷才不妄笞扑苞苴請託無敢進者及去父老餞送江干猶諄諄勸民勿輕訟聞者感之

魯開章字犧堂武陟人吏員道光閒但店巡檢潔已奉公辛卯夏山河漲溢流民入境章倡勸紳耆歛貲護送境內宴然

蔡文熙武威人團風巡檢偉軀幹有勇略咸豐二年廣濟土匪宋觀佑等抗糧聚眾署知府邵綸往撫之知文熙才檄同往文熙投袂起帙首跨雙刀單騎馳赴觀佑陽受撫陰結死黨乘機突入城殺掠時兵弁僅百餘人傷亡過半綸遇害文熙憤曰事不可為矣惟一死以上報

國家下報邵公耳乃格殺數人被重創死

蘄水縣

李蓀字德馨狄道人舉人順治十一年蘄水知縣性勤敏簿書皆手自裁決治敦大體崇節義禁捏誣巨奸斂迹修建廨宇學宮規制宏敞事未竟以忤上官去蘄民惜之

劉佑字雲麓曲周人拔貢順治閒蘄水知縣治敦大體前令李

孫葺學宮未竟佑捐俸落成與邑人士修輯志乘典章文物蔚然可觀

李振宗字欲仙嘉善人進士康熙十八年任蘄水知縣治務寬和留心文獻續輯邑志重修廟學增置倉廩凡所建造皆利於民

侯方夏字于東雲南人舉人康熙四十五年任蘄水知縣廉明慈恕禮士愛民戊子歲歉鄰邑洵洵方夏請於大吏發常平倉賑之邑賴以安去時士民號泣遮留者數日

劉象賢字思菴漢軍鑲藍旗人康熙五十七年以筆帖式任蘄水知縣沈毅有為篤於造士邑故有興賢莊資文生赴鄉試之費象賢捐俸買田租立顓俊莊振興武科雍正初總督楊

宗仁舉行社倉法象賢捐廉買穀董勸紳耆各於城鄉置倉以備荒歉士民賴之

許騰鶴字集之惠來人進士乾隆初蘄水知縣沈靜寡言崇理學創修蘄陽書院構樓祀宋五子於上歲捐金延師課士優者獎勵文教聿興邑有書院自茲始

邵應龍字雲谷餘杭人副貢乾隆間由教習任蘄水知縣勇於任事續輯邑志取廢寺田及官湖租以培書院凡地之有關於前賢勝蹟者皆捐俸新之尋以內艱去

蘇扎哈滿州鑲白旗人乾隆五十九年蘄水知縣慈惠寬和民無冤獄前令高續修邑志蘇扎哈踵成之在任十年善政甚多



錢清履字竹西浙江人舉人嘉慶二十四年任蘄水知縣性豁

達加意士林捐廉倡修文廟並請上憲增撥府學二名

趙鵬翔字雲衢臨城人進士道光十七年任蘄水知縣慈惠廉

明禮賢愛士繼前令曠成春勸捐倡修試院期年告成

王慶雲字仲卿大興人舉人道光二十九年任蘄水知縣秉性

端嚴任事勤敏痛懲盜賊遇可憫者勸令改行盜因斂迹

陳五典字廕莊長武人進士初任穀城有政聲同治元年任蘄

水知縣催科不擾民樂輸將治獄勤慎不事株連邑人稱之

夏策謙字恭占孝感人舉人雍正初蘄水教諭務實學飭行以

孝弟為先語人無隱情衣冠自朝祭外儉樸如寒素司鐸十

年與府教授彭士商齊名

葉繼雯字雲素漢陽人拔貢乾隆五十年署蘄水教諭訓迪勤

懇值歲大旱捐金數百買米賑飢購蘆蓆以瘞死者邑人德

之後成進士官內閣中書

張植黃岡人順治初便宜置官授蘄水縣丞植收集遺民供給

軍需蘄人始定闖逆餘黨襲羅田會梁帥某統兵數千將赴

黔經邑境植敦請協勦賊因遠遁蘄人益安堵

沈啟隆山陰人順治初蘄水縣丞有幹濟才五年春東山寇起

交煽郡縣啟隆從大尹調兵城守又隨大將軍安定旁邑奉

委以數十騎入羅田即攝羅篆事定還蘄以軍功薦擢去

萬世清字輔齋黃岡人武庠生任蘄水把總遇事果敢咸豐五

年中台山禦賊殉難事

聞得卹邑人捐有祀田詳縣志詳人物志

麻城縣

王潞字又韓餘杭人恩貢任麻城知縣八年修舉廢墜勦除賊寇四境安平舊例南糧收貯岐亭水次後移城內東南達宋埠河水淺涸運送艱難潞率里長至宋埠收納費省十之二三

孫宏姓樂安人恩貢康熙十三年任麻城知縣政尚嚴明苞苴悉絕初徵收法不畫一胥吏作奸民累甚宏姓里置一箱一册限民自輸月終躬親會計遂杜挪移之弊邑民勒石紀德屈振奇字鷺容洋縣人進士康熙閒麻城知縣薄賦省刑戡定東山亂賊治號循良建鼓樓修儒學己酉同邑人士纂輯縣

志多所表章

姜櫛字崑麓保德州人進士康熙閒任麻城知縣定徵收條例催科不擾行保甲法平爭訟清盜源招商賈在任三年邑大治後入為行人累官至侍郎

李作室沁源人進士雍正閒任麻城知縣法令嚴明蠹吏屏息好微行訪民間利病舊例催科多用差役反致遲延作室定三限徵收每限二十日為期以里長董之不事追呼而輸將恐後

丁翊壽長興人舉人乾隆三年任麻城知縣善聽斷有劇盜踞山村偵者不敢近翊壽挺身自擒獲其膽畧過人如此單言揚高密人進士乾隆十八年任麻城知縣治尚清肅以儉

率下胥吏服飾不敢侈邑附郭數大坂柴薪皆仰給縣東荒

山山民拒禁構訟數年言揚判荒茅任人樵採坂民以安

劉希向山陽人進士乾隆二十九年任麻城知縣治先教化尤

加意人才捐廉俸修覺宮築城垣清文學田資生徒膏火性

端方無敢私謁者

黃書紳陸豐人舉人乾隆五十六年任麻城知縣愛民禮士設

書院課生徒纂修邑志徵文考獻掌故賴焉

黃家璉字璞山連江人舉人嘉慶閒麻城知縣性和厚以德化

民人不忍欺在任未及一年邑大治擢任去惟布衾敝簏而

已餞送者焚香簇擁三日始能出城父老至今傳頌

陸費瑑原名恩洪桐鄉人副貢嘉慶閒任麻城知縣政尚清廉

捐貲修萬松書院文教彬彬稱盛焉後累官至湖南巡撫

董應魁安邑人進士道光四年任麻城知縣性至孝宅心風教

倡修試院在任八年士民多被其澤

姚國振字芹溪蓋平人道光閒以軍功授麻城知縣晉運同銜

在官十餘年多惠政咸豐四年三月督勇禦賊縣南中館驛

陣亡事

聞贈道銜賜卹准自建專祠並給雲騎尉世職子繩瀛承襲試用司

獄李克慎直隸人同時殉難 贈鹽運司知事附祀

韓寶昌字善甫畢節人監生成豐四年四月任麻城知縣時逆

匪竄境前令姚國振戰沒寶昌受篆卽督勇勦賊未及一月

陣亡於龍困橋事

聞贈知府卹如例

吳林字木齋嘉定人舉人咸豐十一年任麻城知縣性質樸刻苦任事嘗勘案匹馬行數日不倦時粵捻蹂境林預籌修城浚濠築礮臺儲米粟民心安集賊屢圍城以有備輒敗去皆林經畫之力也

劉祝穀字萼樓天津人性剛決同治十二年權麻城知縣折獄明斷囹圄爲空馭吏胥尤嚴門清如水捕治盜賊不遺餘力城中夜不閉戶民風爲之一變

蕭超運黃陂人舉人嘉慶二十五年任麻城教諭老而好學循循善誘不愧名師

萬之傑江夏人舉人性孝友分箸時以恒產讓兄自甘淡泊道

光十七年任麻城教諭有文名與編修金光杰舉人田漢傑

同時人謂湖北三傑教人務先實學一時知名士多出其門

田象三四川華陽人麻城鵝籠司巡檢同治四年在任殉難後給卹如例

黃安縣

詹人訓常山人順治閒黃安知縣清操冰潔性坦易近人嚴束吏胥聿興文教士民樂之

張一躍樂亭人拔貢康熙閒黃安知縣性清介馭吏嚴愛民切至勸諭如家人語捐俸五百餘金修復學宮

張國柱康熙二十二年任黃安知縣奸民以訟受責銜之戊辰歲乘夏逢龍之亂詭連汛兵詐傳僞檄襲城民皆逃散國柱

懷印出收合義勇入城擒渠魁斬之餘黨以靖上憲嘉其才使久任清廉勤敏始終不渝

劉承啟直隸故城人貢生康熙三十五年任黃安知縣弭盜鋤強愛民息訟黃岡詹大衢故名宿承啟親詣其廬聘修邑乘建學宮課士子詳請南折善政甚多

吳象寬海豐人進士雍正三年任黃安知縣化民善俗惠政及人歲歉親歷鄉村勸賑遠者授米近者施粥存活以萬計邑界光羅盜賊出沒象寬嚴捕務清保甲懲惰遊民以安堵捐修學宮及城垣凡義學社倉並加修葺

彭瑞澂丹稜人舉人乾隆閒黃安知縣留心民瘼公暇就田閒父老問疾苦善政宜民居多

朱梓涇縣人舉人乾隆閒黃安知縣性好學著有雙泉堂賦稿喜培植士林倡建奎星樓人文蔚起

林縉光南海人舉人嘉慶閒黃安知縣主修邑乘仕不廢學蒞事廉明不愧循良之目

楊宗時江蘇人咸豐八年黃安知縣時粵匪甫退邑中屍骸枕籍宗時捐廉收瘞葺衙署修礮堡民賴以安

江世玉號樂峰上元人附監生由縣丞歷保知縣同治元年蒞任黃安時河南捻逆出沒不常玉下車即招募健卒設保安局預籌守禦城舊圯玉稟大吏尅期修築躬率士紳巡視嚴戢奸宄去城遠者分立土堡蒼黃轉徙咸有定所賊偶一躡及無所饜其欲乘機迎擊斃獲無算邑人有勇如山立賊不

敢入之謠歲時下詣鄉社廣宣

聖諭一

以忠孝大節相敦勉聞者莫不感奮以條陳楚中防勦事宜大吏嘉許調辦營務去之日泣送者蔽於道年餘訟獄不能平者猶紛紛走訴必得玉一言而後止蓋其在任時敏於治獄不事刑威故民情如此

文齡蒙古人貢生同治初黃安知縣愛民育士值捻匪竄境文齡築城浚濠嚴守禦捐廉俸千餘緡餉軍安邑城守乃固彭焱孝感人歲貢康熙閒黃安訓導工詩文有才名教授生徒遇寒畯尤加意成就

呂庭榭應城人舉人道光閒黃安教諭樂引進後學邑人士多從遊著有詩文賦稿梓行年九十告歸百有三歲卒

李中杰介休人嘉慶二十一年任黃安典史在官十七年儒雅

清廉捐建藕香亭因以名其詩集

梁正興澧州人監生嘉慶十三年任黃陂站巡檢老成練達在任十年鎮靜不擾民咸安之

羅田縣

李雨霽山東人順治己丑進士任羅田知縣單騎就道時寇氛甫熄城市為墟雨霽多方設備勦撫兼施招集流亡開墾田畝汰革陋規興學課士歷任六年邑以安集報最累擢肅州道祀名宦祠

呂鳴和直隸人副貢順治閒羅田知縣仁慈善下勤政剔弊民樂輸將能詩工書時稱雙絕焉祀名宦祠

王光鼎遼東人廕生康熙十三年羅田知縣廉能稱最時荆岳用兵軍需嚴急光鼎傾橐供給不以累民鄰邑慕之爲歌義州行營以歲旱立壇禱雨徒步赤日中率父老泣拜少頃大雨如注民以爲神後塑像祀樾蔭堂祈雨輒應陞嚴州知府祀名宦祠

金世楨奉天人貢生康熙閒任羅田知縣有幹濟才官無廢事歷除積弊歲歉設法賑飢存活無算

沈廷楨鑲白旗人貢生康熙四十二年任羅田知縣寬猛兼濟吏民畏懷捐俸建義學置倉基施義園善政甚多

金珣廣順人貢生有吏才雍正閒羅田知縣事無大小一投卽判未嘗留獄

王眼汝州人進士乾隆二十年任羅田知縣剛方果斷判決如流尤培植士林移建學宮於治東立塔山書院延名師講業公餘身親督之在任十年始終不懈

張元英膚施人舉人事親孝乾隆四十七年任羅田知縣多善政修葺學宮振興文教兩次捐廉俸置興賢莊田二百餘石後令姜廷銘復增置士皆德之

竇毓俊雲南人舉人嘉慶十七年任羅田知縣涖事精勤尤加意人才創建考棚改修書院區畫甫定陞任去至道光初後令楊彪耿澹玉趙振清相繼經營竣事

彭仲芳字杏林化州人舉人咸豐三年任羅田知縣剔弊除奸恩威並用時省垣陷環羅皆賊仲芳練勇堵禦克蕪水英山

太湖等處五年賊眾襲境仲芳力戰陣亡事

聞賜卹入祠太憲廉知其子應鯉才令攝羅篆克承父志屢立戰功

後擢知蘄州

戴俊監利人康熙五十二年以歲貢任羅田教諭樂善好德月

課勤慎獎進後學諄諄不倦捐建黌牆文物一新後祀名宦

孫鍾琇崇陽人舉人道光初羅田訓導學養優邃温厚和平著

有耕心堂制藝人傳誦之

吳必昌通山人同治二年任羅田僧塔汎千總三年賊踞羅境

邑令王臣弼退保多雲鎮集鄉勇規復縣治必昌率所部繼

進遇賊戰於兩河口斬首數級適馬蹶被執不屈死之

劉廷建蘄水人僧塔千總咸豐四年隨知縣彭仲芳督辦團防

屢立戰功五年八月帶勇勦賊在蘄水關口陣亡

蘄州

范鳴珂字鴻磐威遠衛人貢生順治初任江防道駐蘄州時當

兵燹後人民離散廬室蕩然鳴珂多方撫綏稍復生理丁亥

九江之變督師防禦持以鎮靜民不驚擾

呂陽字全五無錫人進士順治閒以薦舉授下江防道冰檠自

茹聽斷明審胥吏屏息平劇盜李有實等力行保甲以清盜

源捐造巡船增修望臺自潯陽至漢川民咸安堵新蘄州學

宮課士衡文循循若師友州人至今頌之

徐惺字子星崑山人進士康熙閒任下江防道多惠政歲歉賑

饑全活甚眾建奎星樓與士人吟詠其中風雅冠時



韓友字心吾陝西人長弓弩知方略順治四年以參將駐防勦辦土寇擒僞總兵曹德參平四十八砦及江州僞將吳高率舟兵攻蘄友出擊殲之鎮蘄六載人民安堵陞總兵去州人祠祀之

王宗堯字銘一廣甯人廕生順治間蘄州知州時文廟燬於寇宗堯新之民困於徭役請給僱役官錢民大稱便

劉國輔字長民奉天人舉人康熙間蘄州知州在任最久諸弊革除時稱鐵面劉

劉淑字文翎臨汾人貢生雍正間蘄州知州性慈愛遇死罪輒不忍決其年致仕瀕行憫窮民逋欠社穀悉爲代完民咸德之

蔣尙德字德輿奉天人舉人乾隆初蘄州知州性謹厚引接善類平反疑獄浚隍渠引流入江以通水利移建營署置書院疊捐廉俸資生童膏火暇與諸生剖晰經義往復不倦由是人益勵學

曾維道直隸人拔貢乾隆五十九年蘄州知州潔已奉公勞心撫字時襄鄖教匪滋擾蘄當上下游之衝調撥差遣軍需旁午維道籌辦悉協而民不驚丁憂當去任大吏慰留事平乃去士民遮道焚香泣送之

顧澍字伴榮錢塘人舉人嘉慶間任蘄州知州十二年性和政簡與民休息著有金粟影菴詩玉堂試帖詩餘等集士林珍之勸修文廟城垣並奎星閣治績丕著

黃州府志 卷之十三  
李諤字遵峯解州人進士道光三年蘄州知州樸誠剛正人莫敢干以私時稱鐵面鏡心常平倉朽壞諤修補添建以廣積儲後多賴之

林壽平字櫟夫侯官人舉人道光十八年署蘄州知州通達事理課士如師愛民如子捐置本城東西義學以育寒畯修建北壇社稷壇以重農桑士民咸愛戴至今祀之

劉鴻庚字西垣會稽人舉人道光二十年署蘄州知州潔已愛民教育士類適海氛不靖兵差絡繹鴻庚悉心籌備軍供不<sub>乏</sub>嘗捐書院膏火重修考棚州人至今歌頌

潘克溥字澤農夏津人舉人咸豐初蘄州知州喜進士人問邑疾苦纂修州志多所裁定著有四書備考詩經說林諸書

黃式度號蘭丞善化人舉人同治閒由知縣陞任蘄州知州實

心撫字民以無擾當兵燹甫靖 文廟書院考棚建置一新

性明決善斷恤民隱振士氣孳孳如不及凡再三任士民歡悅出於至誠尋以內艱歸送者盈途

李功永字書竹黃陂人舉人乾隆閒以聞喜知縣任蘄州學正窮經不輟課士有方

程大中字拳時應城人舉人乾隆閒任蘄州學正訓士有法待諸生若子姓尋成進士文章學問卓越一時學者宗之乾隆乙亥與州牧錢鋈纂修州志生平著述甚富四書逸箋採入

四庫館其餘在山堂集甲乙存稿等書俱梓行

劉進昌號升衢江夏人附貢生同治初任蘄州學正值捻匪犯

境逼近東城昌同知州王庭楨登陴堵禦城賴以妥善後籌修文廟助建濟嬰堂凡諸善舉皆樂為之

魏作霖字雨三新都人廩貢道光己酉任蘄州州判平易近人咸豐甲寅禦賊於野塘背遇害得卹如例

項厚字博安錢塘人附生康熙閒任蘄州吏目清勤好學工詩古文守道孟世泰嘗稱之謂賢而隱於下位者也

陳以績字熙載如皋人附生乾隆閒任蘄州吏目詰奸暴妥善良壬申平馬逆敘功以績與焉

程士然字燕又浙江人武舉任營守備訓練有方陞夔州遊擊調漳州以不附耿逆遇害贈懷遠將軍後家於蘄

廣濟縣

王世名縣志作名世字松谿山陰人順治初權廣濟知縣下車訪民

疾苦嚴懲奸胥請免積年逋賦革陋規聽訟無留獄未幾新令至濟民乞留不得焚香泣送數十里不絕

閻國士字振華保定人歲貢順治十四年任廣濟知縣持已清廉不忍以官價取民物凡丈田均差修學宮輯縣志諸事自

國士始

孫謙亨字有終東安人拔貢順治十六年任廣濟知縣丈田作稅計里均差詳請漕米折解黠保不得侵漁大府才之書上考

黃玉鉉字振公洋縣人進士康熙四年任廣濟知縣值歲凶縷情力請蠲銀四萬餘兩為政恩威並用招流亡勸農業明獄

黃州府志卷之十三  
訟士有貧而未昏葬者必捐俸賙濟去時惟殘書敝笈而已  
顏正色浙江人進士康熙二十三年任廣濟知縣兌漕訖嘗贖  
米三百餘石均勻散還花戶戴德

劉臨渠縣人副貢生康熙閒廣濟知縣初南漕二糧各敷分納  
水腳銀亦分兌民間苦煩擾臨至察其情歸併之民咸稱便  
戊寅蝻災臨單騎出郭籲天泣拜攫蟲食之蟲散去

李世德滿洲人貢生康熙四十五年任廣濟知縣歲屢旱穀米  
騰貴世德發倉廩減價糶時山東大饑流民載道世德就南  
山寺日給粥二次全活多人值癘疫流行施藥療病死者具  
棺殮置漏澤園於萬車鋪惠政良多

李肇梅福清人貢生雍正十三年廣濟知縣有能聲重修學宮

增築龍坪石堤及新河堤壩建梅川書院於黃鵠山置育嬰

堂於西關外士民戴之

張維屏號南山番禺人進士道光閒廣濟知縣勤於政治禮士  
愛民嘗手書廳事楹聯以敦勸邑人後署黃梅亦多惠政公

餘著述自娛所刊南山全集及

國朝詩人徵畧等書風行海內書法遒勁人得片紙爭寶弃之  
黃照字昱齋東莞人舉人道光閒廣濟知縣洩政精勤尤重學  
校滄浪書院舊有膏火歸官管理書吏從而侵蝕照選殷實  
士紳董其事士林始得實惠故事月課兩次照增一次所取  
士捐廉給獎有差

丁鹿壽字莘野南通州人舉人道光閒廣濟知縣作育人材每

課士親為評薦修建考棚率諸生董其事不數月告成邑人樂得庇廕焉

毛鴻順河南武陟人道光乙未進士任廣濟知縣以廉明稱邑有舞文吏鴻順燭其弊重責之後無敢作奸者

陳肖儀字琴泉弋陽人監生咸豐三年權廣濟知縣九月粵匪逼縣治胥吏皆逃或勸暫避不從子恩霖侍側衣冠坐堂上大書撐持天地惟忠孝未靖逆氛心不甘語未畢賊虜至執肖儀父子肖儀罵不絕口乃戕其子於北門擁肖儀於西門河橋支解死事

聞賜卹准建專祠恩霖附祀

胡效順字抒白邵陽人貢生順治十四年任廣濟訓導時學宮

久燬丁祭行於寺乃與教諭傅鏗協力建修約諸生襄事工賴以竣邑令以私忿辱士效順力伸其冤陳通邑疾苦於上官士民德之且捐俸倡修邑志自處布衣蔬食澹如也

譚之琥字禮西京山人歲貢雍正閒廣濟訓導宏覽博物工詩賦古文尤潛心性命之學自十三經注疏及歷代賢儒宗旨罔不研究著有崇祀賢儒錄在任七年以老致仕

劉春甲字午橋襄陽人舉人乾隆閒廣濟訓導時縣令以案牘故入秀才罪春甲不可婉言為解愛惜人才士多德之

姚模字竺君漢陽人廩貢任廣濟訓導月課諸生殷勤考校如塾師並捐廉優獎人皆自奮

姜天棟仁和人順治十三年任廣濟典史縣無城親詣街巷率

民通溝渠伐柵置守柝聲達旦又協議請兵設防境賴以安  
戊戌夏江水暴漲隄幾潰天棟方病瘡強至隄上呼壩卒受  
事隄遂無害又歲旱偕龍坪人露頂跣足祈雨甘霖應焉其  
盡心佐理治績甚多

耿基字慶長聊城人乾隆閒署廣濟典史勤捕務盜皆斂迹民  
獲安枕

黃梅縣

徐昱永平人拔貢順治七年任黃梅知縣甫下車省民疾苦力  
懇緩征逋欠平市價息爭訟創修邑志善政備舉流亡歸集  
者數百戶

李成林廣甯人廕生康熙十三年黃梅知縣丙辰大水鍾公隄

決多流亡會吳逆叛官兵進勦駐紮邑西踏傷禾稼民益洶  
懼成林備設渡船導官兵使出境開倉賑飢流民漸復鍾公  
堤當孔道偕邑丞樓自新露夜奔馳募舟載土鋪隄夾道植  
樹梅邑卒賴以安

歐陽旭丹徒人進士康熙閒黃梅知縣在任六年多惠政時督  
標裁兵夏逢龍叛郡邑官多聞風遁旭與士民設守備晝夜  
環城巡視相依若家人會官兵進勦道出黃梅旭供億不絕  
事平行取刑部主事累官雲南督學

李秉乾漢軍正紅旗人監生康熙六十一年以本府通判攝黃  
梅知縣執法甚嚴勤恤民隱告期收百餘紙就詞立判不煩  
兩造面質邑人服其神明

李珣濟源人舉人雍正元年任黃梅知縣折獄慎刑不憚反復  
值歲歉請發倉穀一萬四千石以貸後民間逋欠約六千石  
悉代償之又請增廣學額治聲丕著累官山東按察使祀名  
宦

王鴻典字慎齋雄縣人舉人乾隆三十七年由應山知縣調署  
黃梅知縣甫下車廉得猾吏摘發之胥役駭爲神多徙業去  
聽訟受牒卽訊控者悉得其情署牒尾使持詣里黨處釋時  
無終訟者徵收有法罷胥役追呼而民無逋賦  
劉學澍李丙皋俱孝感人舉人道光初同爲黃梅校官學有根  
柢訓迪諸生以立品爲重非公不與縣官丞尉相接見培植  
單寒發揚士氣兩人師範略同

史維基大興人同治二年以軍功權篆黃梅甫抵任歲大旱禱  
雨立應邑故澤國夏汛暴發隄防幾潰基董眾堅修民獲安  
堵聽訟無留牘以謂遷延歲月弊實益開民有失業之憂訟  
且不得直焉訪求邑中諸義舉增置崇文堂田畝充士子試  
卷費罄橐中金不惜也尤嫻武事粵逆披猖基官白螺巡檢  
嘗署襄陽知縣創修戰艦督行堅壁清野之法大府策其功  
舉以爲各郡邑式梅固當孔道兵興事尤繁軍需籌辦不以  
擾民親募勁勇迎勦賊眾之逼境者劉塘蔡山大河諸戰績  
邑人士至今猶樂道之

劉振迪化州人任新開司巡檢保護堤塍晝夜周巡不辭勞瘁  
嚴緝盜賊閭閻相安在任三十餘年始終不懈

汪國泰蘄州人武舉咸豐四年任黃梅縣千總是年冬粵匪踞

縣城泰隨官軍謀攻取遇賊戰於金林鎮力竭陣亡事

聞賜卹給廕如例

黃州府志卷之十三終



